





**Freiherr v. Ende-Altjessnitz.**

27

Q. F. F. Q. S.

IN ACADEMIA FRIDERICIANA  
CELEBERRIMI AUTORIS

De  
**RATIONE STATUS**  
Dissertationem V. & VI.

De  
**REVELATIONE ARCANO-**  
RUM ET DE EXPLORA-  
TORIBUS,

Cum adjuncta Qvæstione

*An Sutor possit esse Philosophus?*

Publicè ventilabunt

Die X. Augusti M DC XCIII, horis matutinis ab 8. ad 12.

CHRISTIANUS THOMASIUS,  
Jctus & Prof. Publ.


& Respondens

JACOBUS CONRADUS Keeß/  
Lindaviensis.

---

HALÆ MAGDEBURGICÆ,  
TYPIS CHRISTOPHORI SALFELDII, REGIMINIS ELECT.,  
BRAND. TYPOGR.







Qværo III.

An Sutor possit esse Philosophus?

Videtur.

§. I.



Ariæ Variorum hodie lites

sunt de scriptis Jacobi Bœhmi & ipso autore,  
& solet in ipsis disputationibus sæpe oppugna-  
ri, & Boehmius & ejus scripta, eò, qvod sutor  
fuerit Boehmius. Cum enim qvidam Bœhmi  
asseclæ eum ex amore Philosophum Teutoni-  
cum appellare soleant, & verò adversariis ejus maximè contradic-  
torium esse videatur, sutorem esse Philosophum, notum est,  
qvod ab his ferè uno ore rursus appellari soleat sutor Philoso-  
phus, & per ironiam ejus Philosophia, Philosophia sutoria.

§ II.

Jam uti istam litem meam non facio, ita liceat jam ex li-  
bertate Academica, vel abstrahendo à Bœhmio, qværere, an talis  
sit repugnantia inter Philosophum & sutorum, ut non possint  
combinari in uno tertio? Neqve enim hoc multum nocebit ad-  
versariis Bœhmi, cum, et si sutor possit esse Philosophus, non  
tamen propterea omnis sutor sit statim Philosophus, & mille  
possint illis subesse rationes, ex quibus sibi victoriam in ista con-  
troversia promittere possint, et si sutorum in genere causam his  
thesibus paululum egerimus.

§. III.

Id qvidem constat, si statum hodiernarum Academiarum  
consideres, & divisionem eruditorum in quatuor facultates, non  
A 2 habere

habere spem sutores, ut aut Baccalaurei aut Magistri Philosophiæ possint evadere. Neque enim solemus talia prædicata aptare talibus subjectis, quia præstiterentur Academiæ & facultates Philosophicæ, atque sacrosanctis statutis communibus adversi quid committerent, si sutoribus summos in Philosophia honores tribuerent, qui tamen neque depositi esse solent, neque albo Academico inscripti, neque Latinam lingvam callent, & ita non possunt lectiones Dominorum Professorum frequentare, aut dictata eorum excipere, multò minus Chriam in tentamine promotionis elaborare. Sed jam non quærimus de titulis honorum sed de re ipsa. Ut enim multi sunt Philosophi titulares, qui Philosophiam nesciunt, ita possunt esse multi Philosophi, veri titulis Academicis destituti.

§. IV.

Præterea olim Philosophia totam sapientiam denotabat, olim quatuor facultates artium & scientiarum ignorabat mundus, olim lingua peregrina non faciebat Philosophum, sed Græci Græcè, Latini Latinè philosophabantur; Olim celeberrimi ex Philosophis non involvere intendebant Philosophiam suam terminis abstractissimis & obscurissimis, sed ita aliqui ex iis philosophabantur, ut & sutores eam possent intelligere; Olim ridebatur, qui peculiarem vocationem & privilegium requirebat, ut quis sapientiæ daret operam, aut qui putaret peccare sutorum contra vocationem à Deo ipsi datam, ut sutoriam exerceat, si artem suam exercendo cogitationibus sanioribus simul operam dare allaboraret. Et tamen olim, credo, erat res Philosophiæ, et si neque Socrates, neque Plato, neque Aristoteles titulis Academicis fulgerent,

§. V.

Est vulgatus Canon Metaphysicæ Scholastico-Aristotelicæ: Ab actu ad potentiam valere illationem. Igitur responsionem meam ad quæstionem propositam non melius puto, probare potero, quām si exemplum afferam hominis, qui & egregius Philosophus fuerit, & bonus artifex in arte sutoria. Sistit eum Diogenes Laërtius in vita Philosophorum lib. II. p. m. 87. Simon Athenensis Corianus. Quoties ad ejus officinam perrexisset Socrates, at-

que6

que differeret, omnia quæ meminisse poterat notabat. Unde & ipsius Dialogos  
oraculae appellant, quod inter ejusmodi opifices sint habiti. Sunt autem nu-  
mero triginta tres, qui uno ibidem Codice comprehenduntur: De Diis,  
de bono, de honesto, quid sit pulcrum & honestum, de justo duo, de vir-  
tute quod doceri non possit, de fortitudine sive virilitate tres, de lege,  
de popularitate, de honore, de poesi, de bona valetudine, de amore, de  
Philosophia, de scientia, de Musica, quid sit pulcrum, de disciplina, de  
differendo, de judicio, de eo quod est, de numero, de diligentia, de ope-  
rando, de avaro, de jactantia, de honesto. Alii autem de consulendo, de  
ratione sive aptitudine, de maleficentia. Fertur hic primus omnium So-  
craticos sermones differuisse. Cum autem Pericles polliceretur, si ad se  
veniret, cuncta illi se necessaria exhibiturum. libertatem inquit, vendere,  
consilii non fuerit. Fateor me maximè attonitum fuisse, cum pri-  
ma Laertii verba legerem: Simon Atheniensis Coriarius. Obvenie-  
bant enim mihi statim uno momento omnes illæ rationes, o-  
mnia illa dicteria, quæ tot VIII magnâ autoritate & potentia  
prædicti, sutori Boehmio objecerunt, ut tacite in mente exclama-  
rem: Quid coriarius inter Philosophos? Volui græcum Laertii tex-  
tum consulere, (cum in mea Bibliotheca Latinum Codicem  
saltem habeam,) utrum forte in Græco aliud vocabulum extet  
quod coriarium non significaret, sed cum is non statim ad ma-  
nus fuerit, suppono recte se habere versionem illam, quâ utor.  
Ergo sutor fuit Philosophus.

§. VI.

Fuit & Philosophus egregius. Nam primus omnium Socrati-  
cos sermones differuit, ut Diogenes noster ait. Fuit Socrates fa-  
tentibus ferè omnibus, Philosophorum summus. Summi Philo-  
sophi doctrinam ita capere, ut eam sibi convenientem iterum  
exhibere valeamus, indicium excellentis ingenii est. Magnifici-  
mus Platonem, maximi eum fecerunt Patres primitiva Eccle-  
siæ. At quid aliud sunt ejus libri, quam doctrina Socratis dia-  
logis exposita? Si sutoris nostri dialogos habuissent Patres, for-  
te magis adhuc eum existimascent, quam Platonem. Certè eo  
honore non fuisset indignus, quia si primus Socratics Sermo-  
nes differuit, ergo ante Platonem. Et forte, uti videtur, simpli-

A 3

ci inge-

ci ingenio & sincero fuisse; magis puram ac limpidam Socratis doctrinam exhibuit atque Plato. Ajunt enim, Socratem, cum Platonis Lysidem audisset recitari, prob Dii immortales! dixisse, quam multa de me mentitur adolescens, referente eodem Laertio lib. 3. de vita Philosophorum.

§. VII.

Ulterius quæ scripsit tutor noster, ad universam Philosophiam pertinent, taliaque sunt, aut certè de talibus materiis, de quibus vix celeberrimis hodiernorum Philosophorum constat. Ad primam philosophiam pertinent dialogi de Philosophia, de scientia, de disciplina, de diligentia, de eo quod est, ad Oratoriam fortè de differendo & de numero (nisi ille ad Logicam, hic ad Arithmeticam referendus est, quod jam, cum Codex Græcus deficiat, definire non possumus,) ad poetin dialogus peculiaris, ad Theologiam seu Metaphysicam dialogus de Diis, ad Physicam de bona valetudine, ad Philosophiam activam dialogi plurimi, quos inter maximè doleo dialogos de amore & de pulcro interiisse, tanquam de rebus & cognitu difficultibus & utilissimis. Quod verò virtus doceri non possit, videtur quidem primâ fronte paradoxum esse, sed facile defendi potest, si is sit sensus: vel vulgarem doctrinam virtutis per definitiones & divisiones &c. non reddere virtuolum, sed posse etiam ejus rei scientiam inesse vitiosissimo, vel: appetitum & sensum virtutis non posse ullâ doctrinâ dari hominibus. Qvia autem Socrates morum doctrinam maximè populariter & perspicue traxit, & verò Simon noster nullam præsumptionem contra se habet, quod altiori proponendi modo ac subtiliori fuerit usus, imo potius majori popularitate eum ista proposuisse vero sit simile, quod dialogos illos, teste Laertio, tanquam inter opifices habitos conscriperit, inde iterum ex hoc capite etiam præferrem Philosophiam tutoris hujus Philosophiæ Socratiæ à Platone traditæ, subtilioris sæpe & obscurioris quam vel Philosophia Socratiæ, vel etiæ veræ eruditiois scopus (utilitas & felicitas generis humani) postulabat aut admittebat. Est enim sapientia vera ita apta nata, ut perspicua sit & humano generi communis, unde necesse est eam etiam ab ingeniis opificum intelligi posse.

posse. Unde multo magis libros hōs sutoris deploro , qvam si omnes libri Aristotelis interiissent. Idqve credo , fieri posse pace philosophorum Aristotelicorum. Loqvor enim de meo gusto. De gustibus verò non est disputandum.

§. IX.

Et illud ad præcellentiam hujus sutoris Philosophi pertinet, qvod usus fuerit methodo verâ atqve legitimâ pervenienti ad sapientiam. Qvities, ait Laertius, ad ejus officinam perrexisset Socrates atque differeret, omnia qvæ meminisse poterat, notabat. Notum est, Socratem non scanna posuisse auditoribus, non certam horam ipsis dedisse, non textum iis aut autorem explicuisse, non dictasse, ut ex parte seqventes Philosophi Græci faciebant, & nos hodiè facere consuevimus, sed ibat per plateas & loca publica immiscens se congregationibus hominum frequentioribus, vel etiam in officinis opificum, in qvibus confabulandi causā homines conveniebant, se sistebat, & ibi pro re natâ, ex discursibus qvibuscunque obviis occasionem sumebat præcepta moralia docendi in media confabulatione. Igitur dum sutor noster dicitur notasse ea, qvæ Socrates apud eum differuit, non putandum est, qvod discursum Socratis calamo ex ejus ore excepit, sed cum Socrates in ipsius officina, ipso laborante & calceos aptante, cum aliis collocutus esset, solus posteâ discursum Socratis repetens in mente & notabat sibi, & ita, qvod ajunt, in succum & sanguinem convertebat Philosophiam Socrat  am. Atqve hac methodo si uterentur Juvenes hodierni, n   brevi tempore experiri possent, quantum ill   ruminations & annotationes profint. At vero istam methodum à Juvenibus postulare non possumus docentes, nisi & ipsi perspicu   atqve populariter doceamus.

§. IX.

Frustr   ver   inculcatur Philosophia atqve docetur, nisi in ipsa vita exemplo quoqve tuo te probes esse Philosophum. Probavit & noster. Atqve e   pertinet, qvod cum ei Pericles pollicetur,

retur, si ad se veniret, cuncta illi se necessaria exhibiturum, libertatem, inquit, vendere consilii non fuerit. Voluit verosimiliter Pericles servitio Simonis uti, at servire nescit animus Philosophi. Nemini nisi virtuti servit, & omnibus virtuosis actiones suas sponte accommodat, fugit imperium potentum atque divitum, & contemnit. Si necessitate coactus serviat, corpus servit, animus liber est. At libertas haec in spontanea servitute conservari nequit. Non habebatur Pericles pro vitioso homine, potens erat & autoritate conspicuus apud Athenienses, uno verbo, secundum modum loquendi hodiernum, erat magnus Politicus. Sed uti plerumque magni Politici non magni sunt Ethici, ita & Periclem ad hanc classem pertinuisse, vel ex discursu ejus, quem cum Alcibiade habuit de definitione Legis, apud Xenophontem in memorabilibus Socratis lib. 1. junctis iis, quae de ipso subinde memorat Thucydides, verosimile est. Philosophus autem verus Ethicam, hoc est, sui ipsius cognitionem & emendationem, facit normam Politices, quare renderarum videlicet opum & autoritatis.

#### §. X.

Igitur verosimile est, sutorum non solum posse esse Philosophum, sed & excellentem atque perspicuum, & methodicum Philosophum, Philosophiam suam exemplo experimentem esse posse. Qvod si verum est, uti videtur, verum quoque erit, in posterum oppugnatores Boehmii benè facturos esse, si in Disputatione illa argumentum aut scomma de Philosophia sutoriā omittant, atque de jaliis firmioribus, quae nunquam iis, qui veritatem tuentur, deesse poterunt, circumspiciant. Nam istud quidem Appellis: *Ne sutor ultrà crepidam parum ad rhombum* facit. Non, quod alias pictoribus & Poetis quidlibet audiendi semper fuerit potestas et quae, sed quod apophthegmata pariter ut similia, non sint extendenda ultra tertium. Nos vero ad sutorum nostrum reversi, tacite cogitemus, quia Philosopho clamare non convenit: *VIVAT PHILOSOPHIA SUTORIA!*


*TANTUM.*

00 A 6336




56.

V 3-17  
Rheo ✓



Farbkarte #13

B.I.G.



Q. F. F. Q. S.  
IN ACADEMIA FRIDERICIANA  
CELEBERRIMI AUTORIS

De  
**RATIONE STATUS**  
Dissertationem V. & VI.

De  
**REVELATIONE ARCANO-  
RUM ET DE EXPLORA-  
TORIBUS,**

Cum adjuncta Qvæstione

*An Sutor possit esse Philosophus?*

Publicè ventilabunt

Die X. Augusti M DC XCIII, horis matutinis ab 8. ad 12.

**CHRISTIANUS THOMASIUS,**  
Jctus & Prof. Publ.

& Respondens  
**JACOBUS CONRADUS Reß/**  
Lindaviensis.

---

HALÆ MAGDEBURGICÆ,  
TYPIS CHRISTOPHORI SALFELDII, REGIMINIS ELECT.,  
BRAND. TYPOGR.

27